

隨

園

全

集

文

集



小倉山房文集卷十四

錢唐袁枚子才

祭陶西圃文

嗚呼公來非訣公去不還今日思之來非偶然前年秋仲輒車我園曰官秩滿將覲于天有兒侍側有妾在船妾乃君贈生兩童牙今來君所如來外家離孫謁祖父執呼爺我聞公語喜不自止手斟盞齊庭堆行理臧獲僮僮兒女妮妮夜燭未跋公倦而倚弛氣離坐日營唇哆我心憂之公其衰矣迢迢燕都三千里程綿悵若斯如何可行年逾大董懸車有經欲止公往慮公惋聽意滿口重言復禁聲其時尹莊尙領江左兩相飲公獵纓入坐一友一師笑言之瑳反馬藏輿班荆瑣瑣勸老而休其言如我公心亦悟公行難回家難相逼如弩方開但有前岸而無後崖九月齡天秋容變柳同賦河梁歛歛握手我轉慰公前期正有同年歸愚八十有九三至長安祝帝萬壽晉秩尙書杖朝而走天道難窺人事不偶兩相之言唯唯否否何圖半載叩門聲忙果然訃至曰公路亡婦鬢兒縗麻衣若霜重來我家泣涕浪浪惟公不見公往何方曾曾稚子厭厭其質朝來授經暮來請益似可扶持以繼公業我亦衰老能扶幾時姑盡寸心以告公知嗚呼三十年交二十年別重教一見方成永訣謂天無情似未盡絕謂天有情又似難必滿懷者淚滿頭者雪對飲

原缺二字

依然宴集哀哉尙享

祭莊滋圃中丞文

嗚呼惟公之貴吾不知其所以遂惟公之災吾不知其所由來隆隆者求而公優游易折者剛而公安詳公之行事伊誰勿思公之本末惟我能知公貢于粵游學京師三十年來金躍

飈馳如祥雲之升海夾日以飛其間但兩顛兩起而竟已輕烟過目而不可復追我少公年
實惟兩載丁巳長安閫公丰采度實我客能實我甲假宅道南相優相狎張飲雞社再盟再
飲明年京兆同登賢書明年禮闈同翔天衢 帝策仲舒擢爲第一回顧終軍亦許簪筆凡
公所有則我不無得我相於公亦不孤西清宵宴東觀晨趨人之視之兩劍雙珠小劫昆明
爲懽未渫我宰江左公留燕闕從此乖分走階獵級或旬日之間而周歷三臺或三十之年
而早麾旌節非予小子之早遜先藏幾乎腰笏負轡而向公屈膝一臨浙水兩巡吳門南攜
湘流東釀河源酬知急而立功自喜慮聽瑩而卮言勿聞太定似愎過靜如昏網疎糾惡風
希揚仁民譽民毀萬口猜猜余雖不能執塗人以代曉而要其養體于大宅志于醇鳴呼噫
嘻可告鬼神我嫌公之夷姤公嫌我之疎俊雖隣不覲雖親不近三年一書五年一問恃舊
多規頷而不愠參知政事將離于南交淡而成蕉老而甘訪我空谷穿雲停驂抱我幼女絮
語喃喃公戲我笑我臥公談已握手于白門復開尊于吳下道兩人之齒未莫分襟而悲咤
何圖此酒即是離觴何圖此別萬種滄桑家入搜牢身歸獄市簿責八輩鑿驚三禡罪淺
恩深雷收電止解金木之纏身忽紆青而拖紫雖霜盡以春來終形存而心死果八閩之再
臨竟九泉之已矣嗚呼胡不早終赫然相公胡不少待大福將再不早不遲天實爲之茫茫
人事萬古如斯哀哉尙饗

祭程元衡文

嗚呼三十年交爲一世兮胡爲忍心捨我逝兮君倨身而揚聲眸子銳兮屹屹矜矜何自厲
兮雖業禹莢負奇氣兮用心如稱量天下士兮李蔡下中昧其目而不視兮余過長淮年二

十有四兮君頤未髭忻交臂兮高睨蒼靈期利濟兮似我與君起廬中而可試兮笑言未終
秉燭繼兮猶以爲不足更友其季兮其季魚門肫肫仁兮名滿儒林情尤親兮其季述先吁
嗟聰兮炯介明淑將母同兮我登君庭兄弟笑相迎兮我飲君酒弟兄排日爭兮各有分器
耀瓊英兮各有和羹夸割烹兮嗚呼盛哉三鳳鳴兮日復一日家離析兮年復一年門蕭瑟
兮君張孤軍強鳴鼓而不肯息兮前年君來同話舊兮今年待君君獨後兮忽然書至家業
覆兮代權子母呼負負兮爲此怔忡病莫救兮我答君書善自調兮男兒意氣甯錢刀兮往
書未覆忽聞凶兮知君憂心懷萬重兮又蒸以毒暑莽交攻兮人非金石一病終兮雖然甯
死毋窮眞英雄兮不見其尾如神龍兮從此淮揚吾安從兮嗚呼星落落兮晨傾雪飄飄兮
鬢盈君長寢兮事畢我身在兮心驚誓九京兮泉路長無絕兮交情哀哉尙享

祭商寶意太守文

嗚呼一部天星文昌幾座四海儒冠文人幾個雖神理之綿綿終希音之寡和感陳迹之難
忘恨華年之易過日方極夫溟雲耳驚聞夫楚些寶意先生於越前輩楚國先賢玉容英峙
藻思蟬嫣三微五際學極幽元其立乎世也一意孤行解天弢而獨往其搖乎筆也十指如
電揭雲采以揚鮮蓋天之所與有物來相而人亦靡得而窺焉 皇帝三年詞臣召見萬頸
胥延觀公上殿公忽抗聲臣習簿書願出于外爲王馳驅 天子領之連日宰相宰相怫然
嫌公太戇太液池魚無端跋浪雲屋天構忽逃巧匠畀司馬之間官爲神仙之謫降公改皂
衣竭來江東連謁大府如畏鴈翮屈一足以啟事櫛三律而辦公蘊雅心于俗狀寓巧傲于
拙恭或亭疑而定法或覩白而署空果丹穴之人智亦君子之德風予乞歸娶拜公潤州公

命郎君導余山遊鐵塔風高金焦雨收拾裳連襪酣顏高謳一笑爲樂三宿不休至今渡江
餘夢悠悠予再改官萍蹤重合候巖太史同官先達每欲公留定先我拉脫肉作魚揚觚康
爵光妓遮迤仙童錯雜墜月滿地殘梅半榻一桃夸分二婢爭夾領識微于金奏解彈箏之
銀甲忍袂判于烏衣實魂消于絳蠟已而月儀求去環娘條亡斷斷怒薄悃悃神傷右軍有
深情之帖樂師傳窮劫之章雖風人之偶寄亦足以妖露夫百色而蕭條夫衆芳脫身百粵
遠守哀牢值陣雲之如墨正王師之征苗從此芳訊雨絕噩夢旌搖軍檄火急瘴煙林燒縛
儒衣爲短後挂郡將以弓刀爲欲飛而水墮象未戰而膽消婆娑老子授命如毛燕然易銘
臯蘭難鑒炙忘其口膺撓于腰宜乎碧雞金馬之神未見而先喪夫王褒嗚呼先生四品爵
盡六旬壽畢百卷詩存萬里骨白初聞音而心瞿繼頽思而掩泣雖千秋之道光終九原之
路黑何妨孔巖在而竺師仍來未免惠子亡而莊周無以爲質哀哉尙享

祭薛一瓢文

嗚呼伊已已之仲冬兮余殯殍於牀第謁三醫而莫救兮疑季梁之將死聞先生之渡江兮
心欽遲而欲問所以已軀歟以召之兮復允豫而中止曰斯人之奇介兮託許由之一瓢抱
內經之絕業兮如孤雲之難招甘始投萬金於海兮顏闔鑿坏以逃豈淺淺之山中氓兮所
能執訊以相要忽車聲兮啍啍濂深泥兮叩門儼雅蹠而相對各清談兮干雲上自兩戒之
形巒兮下極三雍之禮樂細而鑄凝手搏之雜伎兮大而風后奇肱之方略五稱兮如響七
發兮皆藥悔予病之不早兮致見君之已晚君亦忘萬頸之胥延兮每一來而不返吳閭兮
再見鵲鵲兮相從君作夷門之大會兮余尋河朔之高蹤聚海內之耆碩兮縱捭闔之談鋒

或擊鉢兮擘錦或捶琴兮歌風春復春兮花落歲復歲兮人空渺山河之一笛送此夕之諸
公天哀民之頽頽多疾兮故留此晨星之孤耀也惟學之靡所不窺兮故能進技于道也乃
門高無客敢撤裾兮偏獨與余以爲好也先生之診疾兮每神遊於象外逞青睛于一盼兮
已穿穴其五內隨靈機以倏變兮遽斬關而扼隘代肺腑以作語兮化瘳苓爲沉瀝奪亢父
之生魂兮走游臯之百怪先生之清尚兮意飄飄而凌九垓貴不足以虞其志兮利不足以
挺其懷吞丹篆兮吸元泉纂真誥兮題靈筌極三微兮窮五際奴金虎兮婢銅仙瘞華陽之
鶴一隻兮畜世隆之龜三千先生杜名銅婢爲龜作巢學其吐納嗚呼方冀至於殊庭兮忽神船之已渡豈大
耄之逢占兮抑風燈之難護乃天道之自然兮苟有朝其必暮雖金丹之如雪兮終玉棺之
必赴惟神理之綿綿兮去恆幹而彌固亂曰化人行矣天酒清兮先生往矣歲星明兮他日
來歸桑海更兮滿世曾孫呼誰聽兮重曰宅掩兮青松園開兮水南我無車兮越弔莽有淚
兮悲含羌招魂兮江上極思心兮潭潭哀哉尙饗

祭妹文

乾隆丁亥冬塋三妹素文于上元之羊山而奠以文曰嗚呼汝生于浙而塋于斯離吾鄉七
百里矣當時雖綺夢幻思甯知此爲歸骨所耶汝以一念之貞遇人訛離致孤危託落雖命
之所存天實爲之然而累汝至此者未嘗非予之過也予幼從先生授經汝差肩而坐愛聽
古人節義事一旦長成遽躬蹈之嗚呼使汝不識詩書或未必艱貞若是余捉蟋蟀汝奮臂
出其間歲寒蟲僵同臨其穴今予殮汝塋汝而當日之情形憬然赴目予九歲憩書齋汝梳
雙髻披單縑來溫繒衣一章適先生參戶入聞兩童子音琅琅然不覺莞爾連呼則則此七

月望日事也汝在九原當分明記之予弱冠粵行汝倚裳悲慟逾三年予披宮錦還家汝從東廂扶案出一家瞠視而笑不記語從何起大概說長安登科函使報信遲早云爾凡此瑣瑣雖爲陳迹然我一日未死則一日不能忘舊事墳膺思之淒梗如影歷歷逼取便逝悔當時不將嬾情狀羅縷紀存然而汝已不在人間則雖年光倒流兒時可再而亦無與爲證印者矣汝之義絕高氏而歸也堂上阿嬭仗汝扶持家中文墨眎汝辦治嘗謂女流中最少明經義諳雅故者汝嫂非不婉嫕而于此微缺然故自汝歸後雖爲汝悲實爲予喜予又長汝四歲或人間長者先亡可將身後託汝而不謂汝之先予以去也前年予病汝終宵刺探減一分則喜增一分則憂後雖小差猶尙殮殍無所娛遣汝來牀前爲說稗官野史可喜可愕之事聊資一懽嗚呼今而後吾將再病教從何處呼汝耶汝之疾也予信醫言無害遠弔揚州汝又慮戚吾心阻人走報及至綿惓已極阿嬭問望兄歸否強應曰諾已予先一日夢汝來訣心知不祥飛舟渡江果予以未時還家而汝以辰時氣絕四支猶溫一目未瞑蓋猶忍死待予也嗚呼痛哉早知訣汝則予豈肯遠遊即遊亦尙有幾許心中言要汝知聞共汝籌畫也而今已矣除吾死外當無見期吾又不知何日死可以見汝而死後之有知無知與得見不得見又卒難明也然則抱此無涯之憾天乎人乎而竟已乎汝之詩吾已付梓汝之女吾已代嫁汝之生平吾已作傳惟汝之窀穸尙未謀耳先塋在杭江廣河深勢難歸塋故請母命而甯汝于斯便祭掃也其旁塋汝女阿印其下兩冢一爲阿爺侍者朱氏一爲阿兄侍者陶氏羊山曠渺南望原隰西望樓霞風雨晨昏羈魂有伴當不孤寂所憐者吾自戊寅年讀汝哭姪詩後至今無男兩女牙牙生汝死後纔周晷耳予雖親在未敢言老而齒危髮

禿暗裏自知知在人間尙復幾日阿品遠官河南亦無子女九族無可繼者汝死我塋我死誰埋汝倘有靈可能告我嗚呼身前旣不可想身後又不可知哭汝旣不聞汝言奠汝又不見汝食紙灰飛揚朔風野大阿兄歸矣猶屢屢回頭望汝也嗚呼哀哉嗚呼哀哉

周筠谿哀詞 有序

壬戌春余官翰林同年陶京山寄聲云有周筠谿者能爲蹕絕之文願受業門下已而來雅相得也其年秋余改官江左卽主其家又一年余知江甯筠谿非衙散時不至至則除學文外一不關口余心高筠谿之爲人而亦未嘗不迂之也亡何筠谿爲中書長安別二十年嘗疑筠谿之文之奇必當得進士其爲中書之久又必當選高爵二者測其然而竟不然前年筠谿乞假歸皤然鬢頽禿矣雖意態強直如故而須臾間便旋者至十數起余心憂其五倉之驟空今年七月竟死嗟乎中書官唐最尊今雖小差而出納王命頗易騰上入軍機房者其尤也筠谿儒緩其衣冠已爲要人所不喜軍機處召之必力辭以故同官皆速飛或至開府三司而筠谿如故也筠谿之意必欲得甲科以完夙願耳乃偏爲幽峭之文屢試屢躓及其乞歸似夫求安恬而樂天年者矣則又不甯其家囊詬無節致嗃嗃病生迹其所爲筠谿之倥傯以死也尤人乎尤己乎謂命乎謂性乎九原有知當必有以自處也然問筠谿死後誰則如其藿立者誰則如其冲澹者誰則如其胸無單複抒心而呈貌者嗚呼豈蒼蒼者亦有人之見存耶不然何憎筠谿而必并其位與年而厯之也筠谿生平無他嗜成制藝一篇必喜躍雖寒夜亦篝燈而起夫時文非古所有也亦非士君子可以終身誦之物也乃天性溺之如先主之聲嵇康之鍛者然其志可哀而陋也前年秋有訛傳余爲逐夫者南都交

好皆錯憚莫或見過而筠谿闐然奎戶而入曰此信訛耶就非訛者筠谿聽役于先生無所畏也無所避也嗚呼赴義若熱如筠谿者獨余好之耳筠谿名際昌辛酉舉人其死時余病疴不獲臨其喪故爲哀詞以抒余懷其詞曰遊羿之彀中而不中兮固鏃羽之數奇然匡衡以不中科而經乃益明兮豈非前賢之可期君蔽于古而不知今兮往往言危而行危偏慄然而意下兮謁吾廬以求師余亦有意乎其爲人兮如風之過蕭冷然而應之慨世俗之滔沿兮非狂者其焉支明知九乾之尊且嚴兮胡甯橫而委蛇喜其旣已歸來兮何妨歷落以嶽崎乃不假之年兮而溘然竟止于斯余又安得窮夫冥冥兮而問造物之則奚

韓甥哀詞

四妹嫁韓氏生兒曰執玉豐頤平額目朗朗照其坐人五歲授離騷辟咤詔之引吭轉音能與古作者意相上下稍長畢六經學制藝及詩清思泉流起止中度詠夏雨云潤回青簞色涼逼采蓮人督學竇公奇之選置上庠甥剪鬻錦襜褕青袍抱而騎鄉之人觀者如堵牆呼曰韓童韓童先是余以十二歲入泮宮甥如其年錢塘父老有存者指而嘆曰昔吾見其舅如是今見其甥如是三十三年矣嗟乎余以早慧故不能遠到然亦入金門進玉堂擁吏卒走數州今且老後無替人念甥質端厚異日必恢宏其聲光故每誦甥文章輒告老母置酒上壽慶外孫聰明今年秋妹寄聲來曰甥出闈月餘病死氣將絕張目問阿嬭曰舉頭望明月下句若何嬭曰低頭思故鄉嘆曰果然如是者再呻吟懽呼喉噓噓響沉瞑目逝矣余不解甥之所以生與其所以死而尤哀其能類我也爲哀詞曰
羌余抱此千秋之絕業兮恒獨立而心瞿得一賢爲後起兮將脫手而傳諸矧宅相之有此

奇兒兮眞懷袖之明珠乃玉方璞而遽毀兮苗將秀而先枯曰兒有故鄉兮乘明月而賦歸歟行行何往兮嗚呼嗚呼

胡稚威哀詞

戊寅秋程魚門信來曰胡稚威死矣嗚呼稚威固不死也稚威之言曰古今人皆死惟能文章者不死雖有聖賢豪傑瑰意奇行離文章則其人皆死稚威所爲文絕涯涘窮攀躋而爲之好爲魁紀公家數險澀峭整綺耦不忤如縻絡缶鼓靜憂堯樂如古篆簡荒厓碣得認一字羣儒相揖而賀雍正十三年 詔舉博學鴻詞禮部尙書任公蘭枝以君薦首相西林鄂公欲見之不可強聘焉則黑而津痘癍著其頰目眴轉雙鬪長不勝外府之裘入雅謁相對問兩戒形轡九乾躔度八十一家文墨口汨汨如傾海相公驚揚於朝曰必用胡某以榮館閣未幾試殿上諸人捧黃紙加墨而稚威鼻軌壺不止血涔涔下汚其卷幾滿相公嘆息延爲三禮館纂修相公薨稚威益困賃長安半椽自居四方求文者輦金幣踵門而稚威性豪歌呼宴客所獲立盡諸公卿爭欲致門下每試爲梯媒者屬至稚威無言入場則盡棄之策文至二千言論或數十字與常式格格不合登甲科屢改乙科稚威凡三中乙科乾隆十六年再薦經學有一品官忌之爲蜚語聞

上御正殿問今年經學中胡天游何如衆未對大學士史公貽直奏胡天游宿學有名 上曰得毋奔競否史免冠搖首曰以臣所聞太剛太自愛 上默然自後薦舉無敢復言稚威者吾與稚威同薦鴻詞初見謂曰美才多奇才少子奇才也年少修業而息之他日爲唐之文章者吾子也呼車行稱余於前輩齊次風商寶意杭堇浦王次山諸先生而勸之來交是

時余生二十一年矣余外出爲令離稚威十五年而稚威死臨死修志太原病太守周西鯨來視稚威稚威已撒帳盛服殮殍拱手曰公來甚佳別矣卽瞑氣縷縷若騰烟須臾張目曰不能不再生人間爲南人乎爲北人乎公爲籌之周泣下曰南人歸南曰然遂氣絕嗚呼稚威果不死也稚威名天游一字雲持山陰人爲之哀詞曰

接萬靈於明廷兮開銀函之九羊有諸嚴繹繹至地而滅兮乃斯人之降祥鈞文在手兮百怪入腸得書靈寶兮問字侯剛載載墨歛兮嶽嶽神光吞海水口猶哆兮夫甯肯飲酒于宵梁昔人之請雨華山與歌巾舞兮至今不能其句讀惟吾夫子之振奇兮思乙乙其來又遊簪方以膚行兮射奇鷁而張穀唱朱干荅落之余謠兮馳成博古諸之文囿惜混元之睢刺兮多溫蠖之紛紛誤鵲爲鳳凰兮強符拔曰麒麟九皇旣不構夫雲屋兮又焉知變人虞慶之孰僞而孰真彼畸人之份俾兮徒雉噫而鼈欬目作宴瑱飽兮面作欺賴猜或僂以媒但兮或舉繆以相排幸闕奕與殷翼兮謀挾君而高舉將爾雲以騰虛兮卒遇巷而失主閼愠倫之修美兮終博然其獨舞予固知萬賤之直兮不能挽一貴之曲也恐圍心而虛天下兮終不能取上駢而禁生其耳目也彼麗麗臣臣之日行千里兮豈三羣之蟲所能度也果千秋之孔揚兮又何懂乎一時之貉縮也昔予瘞曳于長安兮曾僮僮以趨從鎮頤而不予瞬兮愛予之意過其通示大道之首首兮期儒名之翁翁沉牖兮人去弔鳳兮雲遙生縛謳于斥苦兮悲濫脇之孤操豈躍冶于衍亨之瀆兮抑每生於蹢通之郊吾不能神禪其詞而珍怪其聲兮夫甯君魂之可招

余知沭陽時試童子周某文佳疑非其任值之果其師呂君作也呼呂見則淮之弟子員名
文光余傾衿禮之爲磨礱所學邑之人以爲令得重客居亡何余移知江甯年餘行呼唱于
衢有儒衣冠揖車下者文光也問何所欲曰自公去沭文光爲文終莫得開說故棄館穀來
就公余嘉其志爲牒制府列名書院而延之衙課兩孤甥文光伺案牘畢輒袖文請益余梓
直而治文尤苛或嫌于意則喁詬雜作甚至裂其文投地文光磬折取去色不稍忤徹夜搆
削畢則又拱而侍無倦容余內子憐之妻以妹余自視友壻雁行坐而呂執弟子禮愈敬以
乾隆二十二年進士得官滑令滑最大邑簿領紛如文光爲政廉民愛之鄰邑流人冒抵繇
役文光唱名發其姦

天子以爲能遷直隸同知署香河令病亡妻子在滑挈喪歸淮嗚呼文光僅長余一歲耳乃
出處婚娶仕宦生死歷歷過目中如飄雲輕塵欲少停頓不得然則余之老且衰行當自知
之矣悲呂君兼自悲爲之哀詞曰君昔謁我朱顏脩脩我今哭君鬢如禿鷺中二十年風輪
蕩舟花飛影過鴻飛爪留金陵初春長淮晚秋拘袂灑埽負牆咨諏此時風調九原憶不壬
申合卺余歸秦邦遠迎李姬遇鄴于防婚我夕室假我纁裳騷人麻集奮筆催妝舞亂花影
歌沉月光至今僕婢詳記不忘如何十載寡鵠孤翔侈侈夫人麻衣若霜甲戌君來余病而
伏臆然末僂性命危篤君事其師棘心蒿日悻盧其容鑿嫻其足頭觸屏風手僵鐙燭君今
恒化異鄉煢獨誰爲扶持延醫進粥誰爲招魂三呼登屋稚妾憑棺孤雛學哭我德未酬君
歸不復靜言思之淚如雨沃前年書來問我詩文名山事業切勿沉淪願分清俸以付梓人
我乃報謝高義緩敦待我耆艾方可云云君財既富我學亦醖今年書來平章歸計十萬買

鄰將卜此地鹿門夫妻河汾師弟來遊來歌以終身世我又覆君君齒猶未賢者出處蒼生攸繫況又受恩政傳三異名書御屏方將遠至勿學老夫自甘暴棄嗚呼呂君夢盡今宵早知永訣悔不相招早知不歸我亦來邀千條萬端一旦冰消黑色而頰非君貌耶陂聲而散非君笑耶使此人亡甯余料耶泉路交期尙何道耶

趙舍人誄

余二十一歲鴻詞報罷居長安大難句容王郎中琬招往與其兒子通書未三月王公出守興化挈家行余僦然無歸矣同客王氏者趙舍人奮曰子無憂郎中雖去其屋吾賃之其竈吾炊之因共臥起出詩文相礪切亡何予受今大宗伯嵇公聘乃別舍人當是時無嵇公舍人終余食也無舍人余幾不能待嵇公矣舍人故貧士出鄂文端公門下將薦予于文端而爲他客所尼不果薦舍人詩文豪健如其人與御史仲永檀同年仲劾九門提督鄂善賊天子以爲直超遷副都御史舍人與詩以爲薦賢受上賞古有之矣劾人罪受美官于古未前聞也此位公宜辭宜薦賢者如薦賢則吾鄉王次山先生可次山者諱峻嶷嶷有立者也仲覽書頗不可于意不答終以他事敗舍人名貴朴字再白江南常熟人以某年月日卒京師乙卯孝廉官止中書舍人壽四十餘

誄曰子之意氣吞一世兮而止于斯時不副其志兮子之文章萬口推兮而止于斯學不盡其才兮雪紛紛兮長安雨瀟瀟兮虞山誰攬予袂兮誰授予餐嗚呼子壽短兮予情則長我不能報兮亦不能忘

小倉山房文集卷十五

錢唐袁枚子才

與從弟某論釋服作樂書

聞弟釋服有日邑之客有強余賀者云南中風俗是日設酒作樂余聞之瞿然夫服中月而禪再期而除非孝子所得已也先生制禮賢者不敢過愚者不敢不及天下賢者少愚者多然如禮而除其哀忘否未可知也未可知則禮外之意存而先王教孝之心亦終不沒今將欣欣然曰某服釋可賀受賀者亦欣欣然曰既釋服可作樂賀者若逆知其哀之已忘而薄待焉受賀者又若惟恐人不知其哀之已忘而故以酒食歌舞自章明焉凶禮畢而賀得毋嘉禮畢則弔乎夫衰麻直經非先王以之苦人也念孝子哀痛之心誠於中形於外其服食起居有不至於是而不安者故爲之制而又爲之節非若囚拘束縛身受者得早脫一日爲快故禮曰親喪外除言外除者明乎其內未除也且凡云賀者皆人人危得之不可必得而竟得之故賀也如遷官如介壽如獲重器異寶是也若夫三年之喪轉瞬而除衰麻終身世無其事有何慶羨慕悅而爲之賀哉魯人有朝祥而暮歌者子路笑之晉梁龔明日當除父服而奏伎置酒劉隗彈之天性之地不內自訟而使外人笑且彈耶弟思之

上兩江制府請停資送流民書

枚伏見

聖朝嘉惠元元隆天重地每遇振災動費水衡百萬又念天下一家流亡者窮而無告故復定冬留春送之例枚奉揚仁風方愧不能宣布敢議成憲以屯膏哉但意美而法未良或法

立而弊生均宜變易增改以扶政體而厚風俗從來州縣勸災親歷村廬尙多匿飾若外來流民無從核辨惟有遵例資送而已送回後本籍官又不必核辨惟有遵例補振而已于是游惰之民明知村落無災本籍必難入振不如預行外出以求資送又借資送文書以罔本籍是兩相冒也鄉保不得問其名丞尉不得詰其僞也定例夏災不出五月秋災不出九月所以然者以夏秋麥禾未枯尙可耕穫故耳今民橫此例于胸中雨暘偶愆早已奔馳田災未成心災先定定例振銀月給錢二分資送者日給錢二十兩者相較其利孰倍彼負戴之民自養其力每日所獲未盈此數然其妻子自養其行李自備今束手無事而所得相讐有司又爲之養家室雇船驢護送出境假使去而復來周而復始當商賈之經營則奈何州縣胥役在經制者多至百名少不過五六十名流民所集少亦千計以一役送十人千人必得百役一縣之中征徭集訟皆役事也正役無暇必雇白役白無費必填虛名就有聰強州縣督率叫呼極意澄肅然以十人而當一役役不能管束也以一官而解千人官不能彈壓也以江河之風信不齊不能保其前後之不聚積也既聚有千人不能保其不能爲風塵也且其男婦嚶嗒故廉恥喪矣子女遠携故畧賣多矣喧雜嘔穢故疫癘起矣相引爲曹故勢力橫矣當其時船戶之避流民也甚於避風波而村鄉之畏流民也甚于畏盜賊何也船戶載客按路計資一家之命惟船託焉今例載流民船百里十錢不敵民價之半阻風數日價不能增或被流民據爲廬舍焚桿毀篷船戶莫敢誰何惟有一聞資送之信橋藏港伏以致舟楫不通百貨滯積村鄉防盜偶然禁嚴流民則絡繹而來大者簞糧小者伐樹在鄉民以爲告官懼累姑且隱忍而流民自以爲朝廷尙且資送以客待之故任意鴟張枚愚以爲古

之多流民也其病在恩之過少本地無振故迫而爲餬口之謀今之多流民也其病在恩之過多遍地皆振故轉而生游惰之志孟子曰散而之四方者幾千人其病在有司莫以告也今皇上愛民如子誰敢不告災民自當靜守本鄉聽官覈勘毋得出境其不得已而出者亦不必遏抑阻禁之也其無所資而來者自無所資而去何必紛紛官辦譬如人家子弟偶有疾苦捨其父兄不相號呼而遠投千里外之賓客其子弟必非善良矣四方賓客又不問其子弟之是否良莠而栩栩焉概爲設餐授館以歸其父兄其賓客亦太豪舉矣資送之宜停亦猶是也枚請公嗣後辦災一以根本爲主而枝節莫與焉所謂根本者災民之本州本縣也與其設振于四方以引其流離不如加恩于原籍使安其水土申報甯速查勘甯周糴糴甯廣撫恤甯厚如有不軫民艱致凍餒死亡者嚴加劾奏如此則于養民之仁心治民之政體兩無所妨而枚于貢子之責亦庶幾免戾焉謹白

上陳撫軍辦保甲狀

枚聞爲政之道將以便民也然求民便必先求官便何也官便則其心樂而爲之雖殫精竭思而不自知故所爲之政亦致精而不苟若張一法而先使奉法者愕然而阻歡求捨去之不暇則雖胥附以副上意而徒文具之爲其便於民也亦希矣雖然使果便於民卽強吏而行之亦可也若名便民而實擾民則雖大府所行例不格于末吏而明公忘其尊而聽焉亦足彰大君子納諫之雅公督造保甲一檄枚竊惑焉江南戶口大縣百萬有奇小縣十萬有奇十家爲甲百家爲保其甲保無算甲置一牌保置一冊其刊刻紙張繕寫之費又無算來檄以不給丁漕費給之每縣僅數十金如何得足然猶謂逾數歲而一行官吏猶可支吾而

保長無苦或不至有驚擾而求免者今檄文曰立循環二簿一在縣一在民遇有遷移註明冊下每逢朔日保長送衙繳換毋許差擾如不行新查則所造冊一二年內即爲無用云云此斷不可行也即以江甯論之城內居伙房者一宿輒去上河爲驛夫者風順輒去一日之內其遷流來去變動改換者難更僕數也旣不能逐時逐刻而爲循環則甲日之簿乙日已無用矣況以三十日爲一月乎更何所謂一二年也一郡中自鄉至城遠者一二百里近者亦不下數十里保長非農工即商賈一日廢業十日凍飢今令巡簷仰屋執途之人而詢曰某來去某生死某販脂某賣醬無論良民不肯爲必紛紛告退就令拘迫萬方應其名而任其事鄰里鄉黨亦將怪而叱之及至月朔則又將裹糧騎驢奔趨縣堂抱冊者慮損傷投宿者需旅店苦累甚矣且州縣之司閭無幾而官衙之啓閉有常冊衆人雜舛錯必多授受旣親關防必弛其間數百人者或罹于寒暑之故或中乎風雨之災能無怨乎保甲中奸良不一勤惰不齊勤者來惰者不來將聽其壞法乎將終不免于差擾乎良者直書黜者加之變亂其能坐照以知之乎抑將假書吏以耳目乎簿經數填必易新冊重重之費將以累其子孫乎抑亦官捐而吏償乎夫保甲之行將以弭盜也盜賊日攫貨而匿之捕擒官拷猶呼冤誣今使其戚鄰爲鈎距蹤跡未形難以白官蹤跡旣形且畏反噬恐姦民不服而良民反罹于辜且旣不能責之以事前之稽查而徒責之於事發之連坐雖商鞅韓非亦復不忍又謂保甲之行便災振也不知愚民避力役平日報口多減災民貪振臨時報口多增官縱聽強不能記人妻女識人親朋勢必聽其指東畫西詭對強認而平日所存之冊與異日所振之冊多少懸殊終難爲準然則弭盜察振將聽其漫無稽考乎曰保甲者弭盜察振之一端而